

四庫全書

史部

欽定四庫全書

御定月令輯要卷十六

九月令

天道

月卦剝

原易剝不利有攸往本義剝落也五陰在下而方生一陽在上而將盡陰盛長而陽消落九月

之卦也

日在房

原禮季秋之月日在房集說房在卯大火之次也

中星

原禮昏虛中旦柳中淮南子注虛北方玄武之宿柳南方朱雀之宿

律中無射

原禮律中無射集說無射戌律長四寸六千五百六十一分寸之六千五百二十四增史

記律書九月律中無射無射者陰氣盛用事陽氣無餘也淮南子無射之數四十五主九月白虎通九月謂之無射何射者終也言萬物隨陽而終也當復隨陰起無有終已

元月

原爾雅九月為元

內火

原夏小正九月內火傳內火也者大火也者心也

火猶西流

增左傳哀公十有二年冬十二月螽季孫問諸仲尼仲尼曰正聞之火伏而後蟄者畢今

火猶西流司歷過也注火心星也火伏在今十月猶西

流言未盡沒知是九月歷官失一閏左思蜀都賦大火流涼風厲白露凝微霜結

招搖指戌

原淮南子季秋之月招搖指戌增晉書樂志九月之辰謂為戌戌者滅也謂時物皆衰滅也

也

出梁下霜

增春秋繁露季秋九月陰乃始多於陽天乃於是時出梁下霜出梁下霜而天降物固已

皆成矣

萬物畢成

增說文戌滅也九月陽氣微萬物畢成陽下入地也

暮商

原梁元帝纂要九月曰暮商季商

暮秋

原梁元帝纂要九月曰暮秋亦曰末秋

御製秋暮詩落葉催寒早山山草徧枯雪晴麋得食風急

鴈銜蘆松古紛披出林深高下殊漫云沙塞地別自足

饒腴

增晉子夜秋歌適憶三陽初今已九秋暮梁簡文帝詩玉署清餘熱金城含暮秋皇甫冉詩洛下聞

新鴈江東

想暮秋

杪秋

原楚辭靚杪秋之遙夜兮心絛戾而有哀增謝靈運詩杪秋臨遠山山遠行不近梁元帝纂要九月

曰杪秋

陰氣在五

增周易集解黃裳元吉干寶曰陰氣在五九月之時自剝來也

鯉魚風

原提要錄鯉魚風乃九月風也增李賀詩門前流水江陵道鯉魚風起芙蓉老

晏秋

增繁欽秋思賦何晏秋之懽悽處閑夜而懷愁

窮秋

增鮑照白紵曲窮秋九月荷葉黃北風驅鴈天雨霜庾肩吾詩桂巖逢暮序菊水值窮秋

晚秋

增庾肩吾詩早花少餘雪春寒極晚秋李適詩鳳輦乘朝霽鸚鵡林對晚秋朱子詩風高木落晚秋時

日暮千林

黃葉稀

霜秋

增徐彥伯淮亭吟矧鶴唳兮風曉復猿鳴兮霜秋

殘秋

增沈佺期詩郊筵乘落景亭傳理殘秋趙嘏詩獨吟紅葉對殘秋

深秋

增李中詩影疎當夕照花亂正深秋

節序

肅霜

原詩九月肅霜傳肅縮也霜降而收縮萬物疏九月之時收縮萬物者是露為霜也

百工休

原禮是月也霜始降則百工休注寒而膠漆之作不堅好也增謝瞻詩風至授寒服霜降休百

工

辰角見

原國語辰角見而雨畢注辰角大辰蒼龍之角角星名也見者朝見東方建戌之初寒露節也

雨畢者殺氣日盛雨氣盡也

天根見

原國語天根見而水涸注天根亢氏之間也涸也謂寒露雨畢之後五日天根朝見水潦盡

竭也

月令仲秋水始涸天根見乃盡竭增唐書歷志先寒露三日天根朝覲時訓爰始收潦而月令亦云水涸

本見

原國語本見而草木節解注本氏也謂寒露之後十日陽氣盡草木之枝節皆理解也增唐書歷志

後寒露十日日在尾八度而本見

馬見

原國語駟見而隕霜注駟天駟房星也隕落也謂建戌之中霜始降增唐書歷志後寒露十五日而

則蟄蟲墜戶

火見

原國語火見而清風戒寒注謂霜降之後清風先至所以戒人為寒備也增唐書歷志霜降六日日

在尾末火星初見

行嫁娶

原家語霜降而婦功成嫁娶行焉注李秋霜降嫁娶者始此也增荀子霜降逆女

豐山鐘

原山海經豐山有九鐘焉是知霜鳴郭注霜降則鐘鳴故言知也增王褒詩律改三秋節氣應

九鐘霜韓愈上賈滑州書豐山上有鐘焉人所不可至霜既降則鏗然鳴蓋氣之感非自鳴也

庶物堅

增內經各差其分註戌之月霜清肅殺而庶物堅

草花落

增史記李斯傳故秋霜降者草花落
水搖動者萬物作此必然之效也

寒露

增淮南子秋分加十五日斗指辛則寒露音比林
鐘三禮義宗寒露者九月之時露氣轉寒故謂之

寒露

霜降

增淮南子寒露加十五日斗指戌則霜降音比夷
則三禮義宗九月露降為中露變為霜故以為霜

降

正陰雲

增易通卦驗寒露
正陰雲出如冠纓

太陰雲

增易通卦驗霜降太陰
雲出上如羊下如礮石

鷹隼擊

原春秋感精符霜殺伐之表秋季霜始降
鷹隼擊王者順天行誅以成肅殺之威

大火之次

增後漢書律歷志注自亢八度至尾四度謂之大火之次寒露霜降居之宋之分野

青冰菱

增洞冥記旦露池西有靈池方四百步有浮根菱根出水上葉沉波下實細薄皮甘香葉半青

半黃霜降彌美
因名青冰菱也

石鴈飛

增潯陽記廬山頂上有三石鴈霜降則飛

仙人棗

增洛陽伽藍記景陽山南百果園有仙人棗長五寸把之兩頭俱出核細如鍼霜降乃熟食之

甚美一曰

西王母棗

收葵子

增齊民要術葵子收待霜降榜簇皆湏陰中其碎者割訖即地中尋手紉之注傷早黃爛傷晚

黑澀見日亦澀待

萎而亂者必爛

白鴈

增續本事詩北方白鴈似鴈而小色白秋深乃來

霜前白鴈

來謂此

麻生入相

原紀異錄鄭班與李愚同為學士鄭閣上麻生李曰承旨入相矣霜降成實乃白麻也是

夜制出拜相蓋拜相用白麻也

揚兵

增西湖志餘霜降之日帥府致祭旗纛之神因而張列軍器以金鼓導之遶街迎賽謂之揚兵

護霜雲

增嘉定縣志九月霜降而雲為護霜雲

曰次

初一日

辰弗集房

原書乃季秋月朔辰弗集於房
傳集合也不合則日蝕可知

宴宣和殿

增舊唐書穆宗紀寶歷二年九月丁丑朔大
合宴於宣和殿陳百戲自甲戌至丙子方已

薦衣

增唐書禮樂志天寶二年始以九月朔薦衣於諸
陵通典天寶二年勅朕承丕業肅恭祀事至於諸

節常修薦享且詩著授衣令存休漸在於臣子猶及恩
私恭事園陵未標令式自今以後每至九月一日薦衣
於陵寢貽範千
載庶展孝思

講仁王經

增通鑑代宗永泰元年九月庚寅朔置
百高座於資聖西明兩寺講仁王經

拜日

增遼史太祖紀天贊三年九
月丙申朔庚子拜日於蹕林

天壽節

增金史章宗紀明昌四年九月甲子朔天壽節
御大安殿受親王百官及宋高麗夏使朝賀

放鴈

增元史郝經傳汴中民射鴈金明池得繫帛書詩云霜落風高恣所如歸期回首是春初上林天子

援弓繳窮海累臣有帛書後題曰至元五年九月一日放鴈獲者勿殺國信大使郝經書於真州忠勇軍營新館

周伯琦九月一日紀事詩

增九月灤陽道寒烟暗遠坳有山皆積雪無水不成冰獵

犬高於鹿鳴鴉大似鷹欲為風土記問俗果誰憑

初二日

作墨法

增抱朴子作墨法用雞子白真珠麝香合以和墨宜用九月初二日

賜犀金玉帶

增玉海憲宗元和十二年九月初二日出內庫羅綺犀金玉帶賜裴度

賜進士袍笏

增玉海太平興國三年九月二日賜進士胡旦以下綠袍鞞笏自是以為定制

舍譽星見

增玉海祥符二年九月二日司天奏紫微宮中瑞光及舍譽星見告天地宗廟及昭應宮

注輦國表貢

增玉海祥符八年九月二日已酉注輦國主羅乍遣使奉表來貢詣承明殿以盤捧

珠碧玻璃布於御座前降殿再拜

初三日

製仁孝詩

增唐會要天寶八載九月三日肅宗生日帝製仁孝詩六章札於步障以示朝臣宰相奏

曰宸章煥發睿札凝暉垂日月而齊光自雲霄而下濟爰於誕育之日勉以仁孝之經上揚祖宗之美傍考天人之際發揮前古垂範將來

地平天成節

原揮塵錄肅宗以九月三日生為地平天成節增玉海肅宗以景雲二年九月三日

乙亥生於東宮之別殿祥光照室

歌舞水曲

增玉海至道元年九月三日西南蕃王龍漢瑋遣使進奉西南牂牁諸蠻來貢方物帝召

其使詢以地理風俗因令作本國歌舞一人吹瓢笙數十輩連袂宛轉以足頓地為節問其曲譯者曰水曲詔加漢瑋等官賜使者遣還

豐年祥瑞

增玉海淳熙六年九月三日詔明堂免奏祥瑞上曰朕自有真祥瑞豐年是也百姓家給

人足瑞莫大焉

昭靈夫人降

增雲笈七籤方丈臺東宮昭靈李夫人以湯時得道白日昇天受書為東宮昭靈夫

人治方丈臺第十三朱館中東晉哀帝興寧三年乙丑九月三日降於真人楊羲之家

初四日

重明節

增宋史禮志光宗以九月四日為重明節

上獻納大典

增玉海康定元年九月四日丙辰學士晁宗慤上大理評事蘇舜賓所集獻納大典

百卷集歷代諫諍奏議詔送史館

御書尚書終篇

增玉海紹興十三年九月四日御書尚書終篇刊石頒諸州學謂輔臣曰學寫

字不如便寫經書不惟可學字又得經書不忘

初五日

修孔廟器

增六一題跋漢韓明府修孔子廟器碑云永壽二年青龍在涿灘霜月之靈皇極之日永

壽桓帝年號也按爾雅歲在申曰涿灘霜月之靈皇極之日莫曉其義疑是九月五日

選樂工

增玉海建隆四年九月五日詔選樂工八百三十人隸太常習鼓吹

獻屯田論

增玉海咸平四年九月癸酉五日太子中舍張宗誨獻屯田論三篇名試賜第

范成大九月五日晴煖步後園詩

增海氣烘晴入斷霞半空雲影界山斜輕

羅小扇游蜂畔只比東風有菊花

初六日

陳暘樂書

增玉海崇寧二年九月六日壬午何執中奏禮部郎陳暘撰樂書二百卷欲加優獎暘欲

考定中聲更乞送講
議司施行遷賜一秩

士師總龜

增玉海紹興三年九月六日丁巳大理卿李與權以聖賢之訓與謹獄之事分章取義類

聚條分凡三百事列十門總為一書上之繕寫
成五冊名曰士師總龜詔錄副本申尚書省

紫微夫人九月六日示許長史詩

增解輪太霞上斂轡
造紫邱手把八空氣

縱身雲中浮一眄造化細再視索高疇道要既
已是可以解千憂求真得良友不去復何求

初七日

殷七七開花

原唐詩紀事鶴林寺杜鵑花貞元中外國僧自天台鉢盂中以藥養其根來植於此

寺僧見女子遊花下或謂花神也周寶鎮浙西與道人殷七七善謂曰鶴林寺花天下奇絕嘗聞能開頃刻花

可開於重九乎曰可乃前二日往寺宿中夜女子謂七
七曰妾為上元命下司此花非久即歸閬苑今與道者
開之來曰晨起花
漸拆至九日爛熳

增嚴鹵簿

增玉海康定元年九月七日參知政事宋庠
上言車駕行幸自非郊廟大禮具陳鹵簿外

其常日導從唯前有駕頭後擁扇繖而已諸班勁騎頗
與乘輿相遠而士庶觀者率隨扈從之人夾道馳走喧
呼不禁非所謂旄頭先驅清道後行之謹欲望專委博
學近臣檢討前代儀注及鹵簿令以乘輿常時出入之
儀比之三駕諸仗斟
酌儀物增嚴條禁

初八日

太康寺石銘

增洛陽伽藍記綏民里東崇義里有京兆
人杜子休宅地形顯敞門臨御道時有隱

士趙逸云是晉武時人晉朝舊事多所記錄見子休宅
歎息曰此宅中朝時太康寺也龍驤將軍王濬平吳之
後始立寺本有三層浮圖用輒為之指子休園中曰此
是故處子休掘而驗之果得輒數十萬兼有石銘云晉
太康六年歲次乙巳九月甲戌朔八
日辛巳儀同三司襄陽侯王濬敬造

國子監閱禮

增唐會要開元五年九月八日始令鄉貢
明經進士見訖國子監謁先師學官開講

問義有司具食五品以上
官及朝集使皆往閱禮

題餠字

增劉賓客嘉話錄為詩用僻字須有來處緣明
日是重陽欲押一餠字尋思六經竟未見有餠

字不敢為之原聞見後錄劉夢得作九日詩欲用餠字
以五經中無之輟不復為宋子京以為不然故子京九
日食餠有詠云廳館輕霜拂曙袍糗餐花飲鬪分曹
劉郎不敢題餠字空負詩中一世豪遂為古今絕唱

欽定四庫全書

御定月令輯要

卷十六

十

藥市

原事物紀原唐王昌遇梓州人得道號易元子大

皆于九月初集梓州城八日上昇自是以來天下貨藥輩

冲地貨其所齋藥川俗因謂之藥市遲明而散

程君友昇仙

增茅亭客話遂州小溪縣石城鎮仙女埡村民程君友遇道士隨往青城山道士曰

爾有仙表得至於此開囊取丹一粒令吞之曰若有飢渴則可嚼柏葉柏實君友懇祈願住仙齋道士曰爾且歸家吾至九月八日當來迎爾君友歸別止一室嘗焚柏子柏實靜坐無營時嚼柏實三五顆而已門外柏樹下有

大盤石嘗偃息於上至九月七日夜如有所待達旦雲霞相映五色君友躡空而去

菊燈

增乾淳歲時記禁中例於八日作重九非當於慶瑞殿分列萬菊燦然眩眼且點菊燈略如元夕內

人樂部亦有隨花賞

後苑習射

增玉海淳化元年九月八日召近臣後苑習射因御崇政殿觀角抵之戲

馬當助風

原撫遺王勃年十三侍父宦遊江左九月八日舟次馬當山遇老叟曰子非王勃乎來日

重九南昌都督命客作滕王閣序子有清才盍往賦之勃曰此去七百餘里今已九月八日矣夫何復言叟曰吾助清風一席勃登舟翌日昧爽抵南昌

杜甫九日諸人集於林詩

增九日明朝是相要舊俗非老翁難早出賢客幸知歸舊

採黃花臘新梳白髮微謾看年少樂忍淚已沾衣

白居易九月八日詩

增霜蓬舊鬢三分白露菊新花一半黃惆悵東籬不同醉陶家明日

是重陽

皎然九月八日送蕭少府歸洪州詩

增明日重陽今日歸布帆絲雨望霏

霏行過鶴渚知堪住家在龍沙意有遠

初九日

煎茱萸

增禮三牲用茱註茱煎茱萸也漢律會稽獻焉爾雅謂之檄疏今蜀郡作之九月九日取茱萸

折其枝連其實廣長四五寸一升實可和十升膏名之
蕝也本草圖經吳茱萸木高丈餘皮青綠色葉似椿而
潤厚紫色三月開花紅紫色七八月結實嫩時微黃至
成熟則深紫九月九日採原杜審言九日詩蟋蟀歸期
晚茱萸節候新增權德輿九日宴集詩
風吟蟋蟀寒偏急酒泛茱萸晚更香

採菊

增四民月令九月九日可採菊花鍾會菊花賦季秋初月九日數并置酒華堂高會娛情百卉彫瘁

芳菊始榮紛葩
韞暄或黃或青

送菊

原魏文帝與鍾繇九月送菊書歲往月來忽逢九月九日為陽數而日月並應俗嘉其名以為宜

於長久故以享宴高會是月律中無射言羣木百草無有射地而生惟芳菊紛然獨榮輔體延年莫斯之貴謹奉一束以助彭祖之術增沈佺期九月侍宴詩魏文頌菊藥漢武賜萸房

參軍落帽

原晉書孟嘉傳嘉為征西桓溫參軍溫甚重之九月九日溫燕龍山寮佐畢集時佐吏竝

著戎服有風至吹嘉帽墮落嘉不之覺溫使左右勿言欲觀其舉止嘉良久如廁溫令取還之命孫盛作文嘲嘉著嘉坐處嘉還見即荅之其文甚美四坐嗟歎增李白九日詩落帽醉山月空歌懷友生杜甫九日藍田崔氏莊詩羞將短髮還吹帽笑倩傍人為正冠

菊華酒

增西京雜記戚夫人侍兒賈佩蘭說宮內九月九日佩茱萸食蓬餌飲菊華酒令人長壽菊華

舒時并採莖葉雜黍米釀之至來年九月九日始熟就飲焉故謂之菊華酒聖惠方治頭風頭旋用九月九日菊華暴乾取家糯米一斗蒸熟用五兩菊華末搜拌如常醞法多用細麴麴為酒候熟即壓之去滓每煖一小蓋服宋之問重陽應制詩

時菊芳仙

醞秋蘭動睿篇

插萸房

原風土記九月九日律中無射而數九俗尚此日折茱萸房以插頭言辟除惡氣而禦初寒

講孝經

原晉陽秋寧康三年九月九日上嘗講孝經謝安侍坐陸納下耽執讀謝石表宏執經車肩王

溫摘句

丁姑息日

增搜神記淮南全椒縣有丁新婦者本丹陽丁氏女適全椒謝家其姑嚴酷使役有程不

如限者答撫不可堪九月九日乃自經死遂有靈駕發言於巫祝曰念人家婦女作息不倦使避九月九日勿用作事江南人皆呼為丁姑九月九日咸以為息日也今所在祠之

韋商飈館

增齊書武帝紀永明五年九月己丑詔曰九

館上所立在孫陵岡世呼為九日臺者也建康宮殿簿商飈觀在東北十三里籬門亭後亭墩上齊武帝重九

日登以宴羣臣

戲馬臺

原齊書禮志宋武為宋公在彭城九日出項羽戲馬臺至今相承以為舊淮增謝靈運九日從

宋公戲馬臺集送孔令詩良辰感聖心雲旗興暮節鳴葭戾朱宮蘭厄獻時哲餞宴光有孚和樂隆所缺在宥

天下理吹萬羣方悅

馬射

原齊書禮志九月九日馬射或說云
秋金之節講武習射像漢立秋之禮

受旨賦詩

增南史齊蕭子顯傳子顯嘗自為序云前代
賈傳崔馬邯鄲繆路之徒竝以文章顯所以

屢上歌頌自比古人天監六年始預九日朝宴稠人廣
坐獨受旨云今雲物甚美卿將不斐然賦詩詩既成又
降旨曰可謂才子余退謂人曰一顧之恩
非望而至遂方賈誼何如哉未易當也

白衣送酒

原續晉陽秋陶潛九月九日無酒於宅遣菊
叢中摘菊盈把坐其側久之望見白衣至乃

王弘送酒也即使就酌醉而後歸增王勃九日詩九日
重陽節開門有菊花不知來送酒若箇是陶家杜審言
九日詩降霜青女月送酒白衣人李白詩淵明歸去來
不與世相逐為無杯中物遂偶本州牧因招白衣人笑

酌黃

花菊

登高

原續齊諧記汝南桓景隨費長房遊學累年長房

作絳囊盛茱萸以繫臂登高飲菊花酒此禍可除景如

言齊家登山夕還見雞犬牛羊一時暴死長房聞之曰

此可代也今世人九日登高飲酒婦人帶茱萸囊蓋始

於此增物原齊景公始為登高唐詩紀事景龍三年九

月九日中宗幸臨渭亭登高御製序云陶潛盈把既浮

九醞之歡畢卓持螯須盡一生之興人題四韻同賦五

言其最後成罰之引滿是宴也韋安石蘇瓌詩先成于

經野盧懷慎最後成罰酒王維九日憶山東兄弟詩獨

在異鄉為異客每逢佳節倍思親遙

知兄弟登高處遍插茱萸少一人

藉野飲宴

增荆楚歲時記九月九日四民竝藉野飲宴

鳳嶺

增襄陽記望楚山舊名馬鞍山宋武陵王駿為刺史改為望楚山後遂龍飛人號為鳳嶺高處有三

隆即劉弘山簡
九日宴賞之所

湖山讌會

原臨海記郡北四十步有湖山山甚平正可容數百人坐民俗極重九日菊酒之辰讌會

於此山者常
至三四百人

龍沙升高

原水經注贛水又北逕龍沙西沙甚潔白高峻而陲有龍形連亘五里中舊俗九月九日

升高
處也

桑落酒

增齊民要術笨麴桑落酒法預前淨剉麴細剉曝乾作釀池以藁茹甕黍米淘須極淨九月九

日日未出前收水九斗浸麴九斗當日即炊米九斗為饋下饋著空甕中以釜內炊湯及熟沃之令饋上者水深一寸餘便止以盆合頭良久水盡饋熟極軟瀉著蓆上攤之令冷挹取麴汁於甕中搗塊令破瀉甕中復以

酒把攪之每酸皆然兩重布蓋甕口七日一酸每酸皆用米九斗隨甕大小以滿為限假令六酸半前三酸皆用沃饋半後三酸作再餽黍其七酸者四炊沃饋三炊黍飯甕滿好熟然後押出香美勢力倍勝常酒

曲江賦詩

增舊唐書德宗紀貞元十三年九月辛卯九日宴宰臣百官於曲江上賦詩以賜之

山池賜宴

增舊唐書德宗紀貞元十八年九月癸亥賜羣臣宴於馬璘山池上賦九日賜宴詩六韻

之賜

賜詩考第

增舊唐書劉太真傳貞元四年九月賜宴曲江亭詔曰卿等重陽會宴朕想歡洽欣慰良

多情發於中因製詩序今賜卿等一本可中書門下簡定文詞士三五十人應制同用清字明日納於延英門進來宰臣李泌等雖奉詔簡擇難於取捨由是百僚皆和上自考其詩以太真及李紆等四人為上等鮑防于

邵等四人為次等張濛殷亮等二十四人為下等而李晟馬燧李泌三宰相之詩不加考第德宗詩早衣對庭燎躬化勤意誠時此萬幾暇適與佳節并曲池潔寒流芳菊舒金英乾坤爽氣滿臺殿秋光清朝野慶年豐高會多歡聲永懷無荒戒良士期同情

登慈恩寺塔

增唐書李適傳凡天子遊幸秋登慈恩浮圖獻菊花酒稱壽上官昭容九月九日上

幸慈恩寺登浮圖羣臣上菊花壽酒詩帝里重陽節香園萬乘來却邪萸入佩獻壽菊傳杯塔類承天湧門疑侍佛開睿詞懸日月長得仰昭回宋之問奉和詩瑞塔千尋起仙輿九日來萸房陳寶席菊葉散花臺御氣鵬霄近升高鳳野開天歌將梵樂空裏共徘徊

學士別會

增唐書韋綬傳穆宗時九月九日宴羣臣曲江綬請集賢學士得別會

麻葛糕

增六典饌部節日食料九日麻葛糕

賜射

增唐會要貞觀十六年九月九日賜文武五品以上射於元武門啓顏錄唐宋國公蕭瑀不解射九月九日賜射瑀箭俱不著垛一無所獲歐陽詢詠之曰急風吹緩箭弱手馭強弓欲高翻復下應西還更東十廻俱著地兩手併擎空借問誰為此乃應是宋公

豐年多慶詩

增唐會要貞元十八年九月癸亥重陽御製豐年多慶九日示懷詩賜羣臣詩爽氣

肅時令早衣聞朔鴻重陽有佳節具物欣年豐皎潔暮潭色參差新菊叢芳樽滿衛室繁吹疑烟空惠合信吾道保和惟爾同推誠至元化天下期為公

右軍宅會

增十道志臨川郡吳太平二年分豫章之臨汝南城縣立晉王羲之為臨川內史宅於郡

城東偏荀伯子臨川記曰右軍故宅其地爽塏山川若畫每重陽日二千石多萃於斯舊宅及墨池猶存

造脯餅佩符

原金門歲節記洛陽人家重陽造迎涼脯羊肝餅佩癭木符

賞魏謩詩

增唐詩紀事宣宗重陽錫宴羣臣有御製詩其略曰欵塞旋征騎和戎委廟賢傾心方倚

注叶力共安邊宰臣以下應制皆和上曰宰相魏謩詩最佳其兩聯云四方無事去宸豫杪秋來八水寒光起

千山霽色開

上嘉賞久之

沙苑射鶴

原集異記明皇天寶十三載重陽日獵於沙苑雲間有孤鶴回翔上親御弧矢一發而中

其鶴帶箭矯翰西南而逝益州城距郭十五里有明月觀觀之東廊第一院有青城山道士徐佐卿歲率三四至一日忽自外至神爽不怡謂院中人曰吾行山中偶為飛矢所加尋已無恙然此箭非人間所有吾畱之於

壁上後年箭主到此即宜付之仍記壁云雷箭之時則十三載九月九日也及明皇幸蜀暇日命駕行遊偶至斯觀既入此堂忽覩挂箭取而翫之蓋御箭也佐卿所題乃前歲沙苑縱畋之日也佐卿乃中箭孤鶴耳上大奇之因收其箭而寶焉自後蜀人亦無復有逢佐卿者矣

題詩廳事

增北夢瑣言李商隱依令狐楚以箋奏受知相國既歿子綯繼有韋平之拜疎隴西未嘗展分重陽日義山詣宅於廳事上題詩曰曾共山公把酒危霜天白菊正離披十年泉下無消息九日樽前有所思莫學漢臣裁首著還同楚客詠江蓠郎君官貴施行馬東閣無由得再窺綯觀之慙悵局閉此廳終身不處

米錦糕

增食譜張手美家重九米錦糕

曲宴太清樓

增宋史仁宗紀慶歷五年九月辛卯以重陽曲宴近臣宗室於太清樓

孫夫人飛昇

原太平廣記孫夫人三天法師張道陵之妻煉金液還丹依太乙元君所授黃金之

法積年丹成變形飛化無所不能漢桓帝永壽二年丙申九月九日與天師於閬中雲臺白日昇天位至上真

東岳

夫人

尹氏歌

原江南野史永新尹氏女善歌重陽登南山文峰同輩促之歌一曲聲達數十里故俗云尹氏

之歌聞於長安刺史表獻入宮為唱歌供奉

寒花晚節

增李彥平錄韓魏公在北門九日燕諸僚佐有詩云不羞老圃秋容淡猶有寒花晚節香

識者知其晚節之高

滿城風雨

原潘大臨答謝無逸書秋來景物件件是佳致昨日清卧聞攪林風雨聲遂起題筆曰滿

城風雨近重陽忽催租人至敗意止此一句奉寄

布衣與宴

原事文類聚韓忠獻嘗遇重陽置酒私第惟歐文忠與一二執政而蘇明允乃以布衣參

其間都人以為異禮席間賦詩明允有佳節屢從愁裏過壯心還倚醉中開之句其志氣不少衰

飲新酒

增乾淳歲時記重九都人飲新酒泛萸簪菊趙抃詩更上高峰最高處黃花新酒醉重陽

供進夾服

增乾淳歲時記重九日御前供進夾羅御服臣僚服錦襖子夾公服授衣之意也

菊糕

增乾淳歲時記重九都人各以菊糕為饋以糖肉桃麪雜物為之上縷肉絲鴨餅綴以橘顆標以綠

旗又作蠻王獅子於上及麋栗為屑合以蜂蜜印花脫餅以為果餌

設火開爐

增乾淳歲時記重九日御爐設火皇后殿開爐節排當

春蘭秋菊

增乾淳歲時記重九日都人以蕝子微漬梅酒和蔗霜梨橙玉榴小顆名曰春蘭秋菊

菊花洞戶

增東京夢華錄九月重陽都下賞菊有數種其黃白色藥若蓮房曰萬齡菊粉紅色曰桃

花菊白而檀心曰木香菊黃色而圓者曰金齡菊純白而大者曰喜容菊無處無之酒家皆以菊花縛成洞戶

聚香鼎

增清波雜志毘陵士大夫有仕成都者九日藥市見一銅鼎已破闕旁一人贊取之既得問何

所用曰歸以數爐炷香環此鼎香氣皆聚于中試之果然乃名聚香鼎

賜新橋

原合璧事類唐太宗蓬萊殿九日宴羣臣酒賜湖南新橋

服白菊

原太清靈寶方九月九日白菊花二斤茯苓一斤並搗羅為末每服二錢溫酒調下或以煉過

松脂為丸雞子大每服一
丸久服令人好顏色不老

射虎

增遼史禮志九月重九日天子率羣臣部族射虎
少者為負罰重九宴射畢擇高地卓帳賜蕃漢臣

僚飲菊酒免肝為醬鹿舌為醬又研茱萸酒洒門
戶以禳穰國語謂是日為博羅哩烏楚哩九月九日也

拜天

增金史太祖紀收國元年九月九日拜天射柳歲
以為常又禮志金因遼舊俗重九日行拜天之禮

於都城外其制刻木為盤如舟狀赤為質畫雲鶴文為
架高五六尺置盤其上薦食物其中聚宗族拜之若至

尊則於常武殿
築臺為拜天所

花糕宴

增燕都遊覽志重九日勅賜百官花糕宴原帝
京景物略九月九日麪餅種棗栗其面星星然

曰花糕糕肆標紙綵旗曰花糕旗父
母家必迎女來食花糕亦曰女兒節

得橘登第

增莆田縣志碧溪上有仙人巖巖上野橘其實無時得者為瑞宋元祐間方亞夫薛蕃皆

以九日遊巖人得一橘竝登第

祝百事高

原遵生八牋呂公記九日天明時以片糕搭兒女頭額更祝曰願兒百事俱高作三聲

延算齋

增雲笈七籤三洞奉道科云九月九日為延算齋

御製九日幸景山登高詩秋色淨樓臺登高紫禁隈千門

鳴鴈度萬井霽烟開翠拂鑾輿上雲隨豹尾來佳辰欣

宴賞滿泛菊花杯

御製九日對菊詩不與繁花競寒苞晚更香數莖偏挺秀

嘉爾傲風霜

雲林右英夫人九月九日詩

增晨闕太霞構玉室起霄清領略三奇觀浮景翔絕

冥丹華空中有金暎育挺精八風鼓錦披碧樹曜四靈華蓋陰蘭暉紫轡策綠輶結信通神交觸類率天誠何事外象感須覩瑶玉瓊

陶潛九月九日詩

增靡靡秋已夕淒淒風露交蔓草不復榮園木空自凋清氣澄餘滓杳然

天界高哀蟬無流響叢鴈鳴雲霄

梁丘遲九日侍宴樂遊苑詩

增朱明已謝葍收司禮爰理秋被備揚旌榮奉璋我

我金貂濟濟上林弘敞離宮非一綵殿迴風丹樓映日隨珠甲帳屯衛周悲晬容徐動天儀澄謐雲物旂颺光

景高麗枯葉未落黃花委砌絲桐激
舞楚雅開蕙參差繁響殷懃流詣

唐高宗九日詩

增端居臨玉宸初律啓金商鳳闕澄秋
色龍闌引夕涼野淨山氣斂林疎風露

長砌蘭麝半影巖桂發全香滿蓋荷彫翠圓花菊散黃
揮鞭爭電烈飛羽亂星光柳空穿日碎弦虛側月張怯
猿啼落岫驚鴈斷分行斜
輪低夕景歸旆擁通莊

唐德宗重陽日中外同歡以詩言志因示羣官詩

增爽
節在

重九物華新雨餘清秋黃葉下菊散金潭初萬寶行就
稔百工欣所如歡心暢遐邇殊俗同車書至化自敦睦
佳辰宜宴胥銚銚間絲竹濟濟羅
簪裾此樂匪足耽此誠期永孚

李嶠九日應制詩

增令節三秋晚重陽九日歡仙杯還
泛菊寶饌且調蘭御氣雲霄近乘高

宇宙寬今朝萬壽

引宜向曲中彈

李义九日應制詩

增望幸紆千乘登高自九重臺疑臨戲馬殿似接疏龍捧篋萸香遍稱觴

菊氣濃更看仙鶴

舞來此慶時雍

張說九日進茱萸山詩

增家居洛陽下舉目見嵩山刻作茱萸節情生造化間

王維和聖製重陽節宰臣及羣官上壽詩

增四海方無事三秋大有

年百工逢此日萬壽願齊天芍藥和金鼎茱萸插玳筵

玉堂開右个天樂動宮懸御柳疎秋景城鴉拂曙烟無

窮菊花節長

奉柏梁篇

杜牧九日齊山登高詩

增江涵秋景鴈初飛與客携壺上翠微塵世難逢開口笑菊花

須插滿頭歸但將酩酊酬佳節不用登臨怨
落暉古往今來只如此牛山何必淚沾衣

歐陽修九日詞

增九日歡遊何處好黃花萬萼雕欄遶
通體清香無俗調天氣好烟滋露結功

多少

日脚清寒高下照寶釘密綴圓斜小

落葉西園風嫋嫋催秋老叢遶莫厭金樽倒

蘇軾九日次韻定國詩

增菊盞萸囊自古傳長房寧復
是懼仙應從漢武橫汾日數到

劉公戲馬年對玉山人今老矣見恒河性故
依然王郎九日詩千首今賦黃樓第二篇

蘇軾九日舟中望見有美堂上魯少卿飲以詩戲之

增

點雲間數點紅笙歌正擁紫髯翁誰
知愛酒龍山客却在漁舟一葉中

朱子九日登天湖詩

增去歲瀟湘重九時滿城寒雨客
思歸故山此日還佳節黃菊清樽

更晚暉短髮無多休落帽長風不斷且吹
衣相看下視人寰小祇合從今老翠微

初十日

小重陽

增玉海貞元十年九月十日戊子以重陽賜百
僚追賞原歲時記京師士庶多於重九後一日

再會謂之
小重陽

御製康熙十七年九月初十日奉

太皇太后臨御溫泉恭紀五言排律八韻

慈寧方曉日掖輦幸溫泉羽騎清塵道華旗衛御前九重雙
闕迴三輔萬家連蔥鬱東臯樹蒼茫北嶺烟問安頻色

喜侍膳每心懸孝養尊

親重時巡法

祖虔村村施化溥處處得恩先更慮民情隱深慚撫八埏

鄭谷十日菊詩

原節去蜂愁蝶不知曉庭還繞折殘枝
自緣今日人心別未必秋香一夜衰

徐鉉十日和張少監詩

增重陽高會古平臺吟徧秋光
始下來黃菊後期香未減新詩

捧得眼還開每因佳節知身老却憶前歡似
夢迴且喜清時屢行樂是非名利盡悠哉

十一日

送河州守

增玉海嘉祐二年翰林侍讀學士李淑以九
月十一日出守河州御製五言六韻詩示之

進西漢會要

增玉海嘉定四年九月徐天麟表進所編西漢會要七十卷總為十五門分三百六

十有七事十一日

丁卯有旨藏秘閣

展藥市

原事物紀原梓州九月初八日藥市建本朝天聖中燕龍圖肅知郡事又展為三日至十一日

而罷

十二日

定律尺

增玉海景祐二年九月十二日依新泰定律尺每十黍為一寸

儋耳醉書

增長公外紀九月十二日東坡在儋耳與客飲酒小醉信筆書曰吾始至南海環視天水

無際悽然傷之曰何時得出此島耶已而思之天地在積水中九州在大瀛海中中國在少海中有生孰不在

次定四庫全書

御定月令輯要

三

島者覆盆水於地芥浮於水蟻浮於芥茫然不知所濟少焉水涸蟻即徑去見其類出涕曰幾不復與子相見豈知俯仰之間有方軌八達之路乎念此可以一笑

鑄鼎作鸞刀

增玉海皇祐五年九月十二日戊寅鑄鼎十有二園丘用五宗廟七又作鸞刀郊廟

各一初賈昌朝侍經筵帝問鼎卦聖人亨以享上帝今郊何以無鼎昌朝不能對曰容退而講求於是詔禮官議以為郊有亨牲進熟遂命阮逸胡瑗鑄銅鼎制鸞刀帝親書刻之牛鼎容一斛羊鼎五斗豕鼎三斗

宴右文殿

增玉海淳熙五年九月十二壬申日辛秘書省受朝右文殿移御秘閣入東西壁觀累朝

御書上手以光堯太上皇帝所書琴賦示羣臣諭曰此鍾王所不及既又脩太平興國故事張宴右文酒五行罷翌日癸酉賜御製詩詩有宴開芸閣坐對蓬山之語

寺塔現光

增識小編永樂十七年九月十二日欽頒佛經至大報恩寺當日夜本寺塔現舍利光如

寶珠次現五色毫光慶雲捧日

十三日

獻瑞應圖

增唐會要開元十三年九月十三日潞州獻瑞應圖上謂宰臣曰朕在潞州但靖以恭職

不記此事今既固請編錄可名藩僚問其實事然後修圖

講乾卦

增玉海皇祐四年九月己未十三日御閣召賈昌朝講乾卦用九曰外以剛健決事內以謙恭

應物詔褒答以卦義付史館上曰昌朝位將相而執經朝廷美事也

上寬恤詔令

增玉海紹興二十五年九月十三日丁巳宰臣上寬恤詔令一百六十八卷目錄三

十一卷修書旨揮一卷共二百卷五十門詔名曰紹興編類寬恤詔令頒行之

十四日

賞緋紫魚袋

增蘇氏記自永徽已來正員官始佩魚至開元八年九月十四日中書令張嘉貞奏

致仕及内外官五品已上檢校試判及内供奉官準正員例佩魚自後恩制賞緋紫例兼魚袋謂之章服

觀騎射

增玉海乾德四年九月十四日觀衛兵騎射張樂賜從官飲

香檀魚契

增玉海皇祐二年九月十四日庚子皇城司上新作文德殿香檀魚契契有左右左右雷中

右付本司各長尺有一寸博二寸八分厚六分刻魚形鑿杓相合鏤金為文車駕至門勘契官執右契奏閤門

使降左契勘契官勘畢奏云外契合

十五日

神著立

增唐會要景龍二年九月十五日臨淄王將朝京師使術士韓從禮筮之卦未成而一著翹立

從禮曰此天人之瑞潘炎神著立賦惟聖人之觀象乃神動而鬼入列八卦以效變翹孤莖而予立著之立今發其祥吾君得之尊以光明乎太極演彼歸藏因卜祝之符瑞應天人之會昌

邇英講論語

增蘇軾詩集九月十五日邇英講論語終篇賜執政講讀史官燕於東宮又遣中使

就賜御書詩各一首臣軾得紫微花絕句翌日各以表謝又進詩篇

水晶宮

增豹隱紀談吳興之水晶宮不載圖經刺史楊漢公九月十五日夜絕句云江南地煖少南風

九月炎涼正得中溪上玉樓樓上月清光合作水晶宮後來林子中聞滕元發得湖州以詩賀何洵直邦彥曰

清風樓下兩溪春三十餘年一夢新欲識
玉皇香案吏水晶宮主謫仙人因為故事

朱文公生

增延平府志文山在青印溪濱隔溪為公山
邑人義齋鄭氏居此宋韋齋先生朱松為尤

溪尉任滿假館於鄭氏建炎庚戌九月十五日考亭夫
子生焉先是二山草木繁密及考亭既生野燒同時盡

焚山形畢露儼

若文公二字

大禮喜晴

增西湖志餘淳熙三年九月十五日明堂大
禮十三日雨未時奏請宿齋十四日駕詣景

靈宮回太廟宿齋雨不止十五日晴色甚佳車駕自太
廟乘輅還內日映御袍天顏甚喜張掄進臨江仙云聞
道彤庭森寶仗霜風逐雨驅雲六龍扶輦下青冥香隨
鸞扇遠日映赭袍明簾捲天街人頂戴滿城喜氣氤氳
等閑散作八荒春祇知
天意好昨夜月華新

僧廣宣九月十五日夜宿鄭尚書東亭詩

增霜天晴夜宿東齋松竹

交陰愜素懷迥出風塵心得地可憐三五月當階

梅堯臣九月十五日夜北樓望太湖詩

增東吳臨海若看月上青冥河

漢微分練星辰淡布螢細烟沉遠水重露裛空庭孤坐饒清興唯將影對形

十六日

置醫學

增玉海貞觀三年九月癸丑十六日諸州置醫學御製廣濟廣利等方書

龍見中天

增懸筭瑣探天順七年九月十六日有一物見於中天淡白垂長數丈尾微曲少頃不見

忽又垂出閃閃若動細如數百丈線人言是龍也

十七日

藝文類聚成

增唐會要高祖武德七年九月十七日給事中歐陽詢奉敕撰藝文類聚成上之

試賢良方正

增玉海景德三年九月十七日丙辰御崇政殿試賢良方正錢易石待問

補九域志

增玉海紹聖四年九月十七日兵部侍郎黃裳言今九域志所載甚略願詔職方取四方

郡縣山川民俗物產古跡之類輯為一書補綴遺缺詔秘書省錄山海經等送職方檢閱

書資治通鑑

增玉海建炎二年九月十七日戊戌日上書資治通鑑第四冊賜黃潛善

十八日

賜稽古閣名

增玉海大觀二年九月十八日州縣藏書閣賜名稽古

幸玉津園

增玉海淳熙元年九月十八日幸玉津園宴射賦七言詩賜曾懷以下與宴者皆和

明太祖誕生

原盱眙志天歷元年九月十八日未時太祖高皇帝誕生龍興慈記誕時攜浴於河

忽水中浮起紅羅一方取為襁今名紅羅幃云

朝菊花

增韓琦閱古堂前植菊二本九月十八日花猶未開因以小詩嘲之只趣重陽選菊栽當欄殊

不及時開風霜日緊猶何待甚得迎春見識來

唐德宗九月十八日賜百僚追賞因書所懷詩

增雨霽霜氣肅

天高雲日明繁林已墜葉寒菊仍舒榮懿此秋節時更延追賞情池臺列廣宴絲竹傳新聲至樂非外獎浹歡同中誠庶敦朝野意永使風化清

十九日

展重陽

原事文類聚九月十九日曰展重陽

廷試賜御書

增玉海紹興五年九月十九日賜新及第汪應辰以下御書石刻中庸篇廷試畢賜

御書自此始

此始

菊花賦

增退齋雅聞錄劉拱衛遠宣和初守祁州嘗接伴北使李處能處能謂遠曰本朝道宗皇帝好

文先人昔荷異眷嘗于九日進菊花賦次日賜批答一絕句云昨日吟卿菊花賦碎剪金英作嘉句至今襟袖

有餘香冷落秋風吹不去

范成大九月十九日飲清心堂觀晚菊詩

增歸來翠帷卷聊共黃花

笑雖無落帽風
亦復接羅倒

二十日

幸講武臺

增玉海太平興國二年九月
辛亥二十日幸講武臺大閱

賜御書尚書

增玉海紹興五年九月二十庚寅日賜趙
鼎御書尚書一部翼日鼎奏謝上曰尚書

所載君臣相戒救之言所以
賜卿欲共由此道以成治功

蘇軾九月二十日微雪懷子由弟詩

增岐陽九月天微
雪已作蕭條歲暮

心短日送寒砧杵急冷官無事屋廬深愁腸別後能消
酒白髮秋來已上簪近買貂裘堪出塞忽思乘傳問西
琛

二十一日

上歷法九議

增玉海乾道六年九月二十一日成
都歷學進士賈浚上歷法九議一冊

逢栲栳

增前定錄延陵包隰泝舟於隋河時已迫選限
率僮僕為之挽過符離縣西古樹下有穴若廢

井然一僕忽誤墜落久而方出提一片石有小篆曰旁
有水上有道八百年中逢栲栳衆咸異之而莫知所謂
尋問墜坑者名栲栳也時元
和三年九月二十一日矣

二十二日

置官均貨

增唐會要武德元年九月二十二日
高祖詔置常平監官以均天下之貨

書坐右屏

增玉海建炎二年九月二十二日內出親書
坐右素屏旅葵一篇大有大畜二卦與孟子

之言七凡十扇遣
中使宣示宰執

孔武仲九月二十二日西館雨中詩

增西館蕭然擁蜀
裘渾無桃李似潘

侯路多綠竹遮開雨池有殘荷掩映秋
蟾獠謳歌逢樂
歲江湖風景憶扁舟衣冠到底為身累祇慕逍遙寄一
丘

二十三日

進大射圖

增玉海淳化五年九月壬子二十三日中書
門下獻大射圖大約如朝謁元會之禮酒三

行有司奏賜王公下射侍中稱制可皇帝改服武弁射
於殿上布七埒於殿下自公卿大夫各有著位開樂虞
於東廂中設熊虎等侯陳賞物於東階以賞能者設醴
爵於西階以罰否者並畫其冠冕儀式表著埒埒之位

以進上覽嘉之

唐庚九月二十三日天氣始寒詩

增朝來怪底冷前此已重陽漸逼袴襦節

稍聞灰火香烟嵐向冬淨橘柚得霜黃嶺表雖多暑天時亦有常

二十四日

置安西都護

增唐會要貞觀十四年九月二十四日平高昌於西州置安西都護府治交河城

天清節

原玉海周世宗九月二十四日生名天清節百寮上表曰壽丘降跡爰符出震之期里社應祥

式契承乾之運侯屬澄河時當降聖鰈水鷄林望堯雲而獻祝桓圭穀璧趨禹會以駿奔請以二十四為天清節所冀金相玉振負寶歷以彌新地久天長煥文編而不朽從之

觀鬴

增玉海天禧二年九月二十四日壬午上御樓觀鬴宴是日慶雲見於樓上日生赤黃珥

章奏置籍

增玉海乾道二年九月秘書少監汪大猷言陛下樂聞忠言內之臺諫外之監司郡守又

有輔臣之轉對公車之名見隆寬廣問殆無虛日欲望凡臺諫侍從章奏各置一簿隨所上錄之一畱禁中時備觀覽或可采付外施行一授大臣使詳閱庶幾言皆底績二十四日甲子詔臺諫章奏置籍以便觀覽

聖德記

增玉海嘉定五年九月二十四日吏侍彭龜年之子欽纂龜年勸講所得聖語及事實本末名

聖德記上之
詔付史館

二十五日

加減糴糶

增唐會要開元二年九月二十五日以穀賤傷農令諸州加時價糶米賁減價以糶

大饗明堂

增玉海皇祐二年九月二十五日巳酉以大饗明堂具大駕鹵簿赴景靈宮行薦饗禮畢

齊於太廟翼日庚戌詣七室行朝饗之禮降神樂作帝密諭樂卿令備其音節禮儀使請憇小次帝拱立益壯

陸游九月二十五日早起待旦詩

增堪笑枯腸漸畏茶夜闌坐起聽城笳爐

溫自撥深培火燈暗猶垂半結花斷夢不妨尋枕上孤愁還似客天涯埽塵拾得殘詩藁滿紙風鴉字半斜

二十六日

改佩金龜

增唐會要天授元年九月二十六日改内外官佩魚為龜

召觀圖屏

增玉海祥符二年九月丁丑二十六日召宗室觀書龍圖閣因覽尚書圖皇祐之無逸圖

治平之
洪範屏

二十七日

校試材武

增玉海康定元年范仲淹請選諸軍班材武九月二十七日命學士王度等校試差為五

等中選者百八十一人

建射圃

增玉海淳熙元年九月二十七日詔臨安府擇寬閑地建射圃備百僚習射

二十八日

校獵近郊

增玉海太平興國二年九月二十八日丙辰校獵於近郊帝御弧矢射走兔四

梅堯臣九月二十八日題牡丹詩

增香苞已向青春發又見秋深特地開應

笑菊殘無意思不能邀賦洛陽才

范成大九月二十八日湖上檢校籬落詩

增村北村南打稻聲荒園

屐齒亦嬉晴菊遶更覺朝陽好松下偏聞晚吹清一歲無非吾樂事千金不博此閑行周遭踏遍芙蓉岸足痺

腰頑初輕

二十九日

幸慶善宮

增唐會要貞觀六年九月二十九日幸慶善宮宴從臣於渭濱其宮即太宗降誕之所上

賦詩十韻賞賜閭里有同漢之豐沛焉於是起居郎呂才播於樂府名曰功成慶善樂

蘇軾草九月二十九日賜文彥博生日詔

增陽月載臨剛辰協吉篤

生元老弼亮四朝允為廊廟之華豈獨閨門之慶往膺寵數永錫壽祺

三十日

天開眼

增樂郊私語已亥秋九月晦余曉詣嘉禾時曉星猶在樹杪忽西南天裂數十百丈光燄如猛

火照徹原野一時村犬皆吠宿鳥驚飛諦觀裂處蜈蚣而動若金融於冶鑄者少時方合操舟者謂余曰此天開眼也

元稹賦得九月盡詩

增霜降三旬後莫餘一葉秋元陰迎落日涼魄盡殘鉤半夜灰移琯

明朝帝御裘潘安過
今夕休詠賦中愁

杜牧夜雨詩

增九月三十日雨聲如別秋無端滿階葉共白幾人頭點滴侵寒夢蕭瑟著淡愁漁

歌聽不唱裘
溼棹迴舟

次定日軍人書

御定月令輯要

三

徐鉉九月三十夜雨詩

增獨聽空堦雨方知秋事悲寂寥旬假日蕭颯夜長時別念紛

紛起寒更故故遲情人如不醉定是兩相思

政典

居總章右个

原禮天子居總章右个西堂北偏

申嚴號令

原禮是月也申嚴號令命百官貴賤無不務

之也會猶聚也疏於此月之時救命百官貴之與賤無不務內內謂收斂其物言貴之與賤無有一人不勤務收斂內物以會天地之藏者會猶趣也言心皆趣嚮天地所藏之事謂心順天地以深閉藏也無有宣出者以物皆收斂時又閉藏無得有宣露出散其物以送時氣

藏帝籍之收

原禮乃命冢宰農事備收舉五穀之要藏帝籍之收於神倉祇敬必飭疏帝籍者供

上帝之籍田也神倉者貯祀鬼神之神倉也言天子於此月命冢宰藏此帝籍所收禾穀於此神倉之中當須敬

而復敬必使飭正

命民入室

原禮乃命有司曰寒氣總至民力不堪其皆入室集說總至凝聚而至也

入學習吹

原禮上丁命樂正入學習吹注為將饗帝也春夏重舞秋冬重吹也疏習舞吹必用丁者

取其丁壯成就之義欲使學者藝業成故也增月令章句季秋之月上丁入學習吹所以通氣也管簫笙竽塤

篪皆以吹鳴者也

大饗帝

原禮是月也大饗帝注言大饗者遍祭五帝也增集說仲夏大雩祈也此月大饗報也三禮義

宗九月大享帝於明堂之中孝經云宗祀文王於明堂是也舊唐書禮儀志季秋祀五方天上帝於明堂元帝配牲用蒼犢二五人帝五

官竝從祀用方色犢十

犧牲告備

原禮嘗犧牲告備於天子註嘗者謂嘗羣神也天子親嘗帝使有司祭於羣神禮畢而告

焉

合制受朔

原禮合諸侯制百縣為來歲受朔日註秦以建亥之月為歲首於是歲終使諸侯及鄉遂

之國受此法焉合諸侯制者定其國家宮室車旗衣服禮儀也諸侯言合制百縣言受朔日互文也

教田獵

原禮是月也天子乃教於田獵以習五戎班馬政註教於田獵因田獵之禮教民以戰法也五

戎謂五兵弓矢戈戟也馬政謂齊其色度其力使同乘也校人職曰凡軍事物馬而頒之增月令章句季

秋之月天子乃教於田獵習五戎班馬政其出以順時
取禽其禮將軍執晉鼓師率執提旅率執輦以教坐作
進退疾徐之節

主祠祭禽

原禮命僕及七騶咸駕載旌旒授車以級整

執弓挾矢以獵命主祠祭禽於四方註僕戎僕及御夫
也七騶謂趣馬主為諸官駕說者也級等次也整正列
也設陳也屏所田之地門外
之蔽以所獲禽祀四方之神

趣獄刑

原禮乃趣獄刑毋畱有罪註
殺氣已至有罪者即決也

收祿秩供養

原禮收祿秩之不當供養之不宜者註天
氣殺而萬物咸藏可以去之也祿秩之不

當恩所增加也供養之不宜
欲所貪者熊蹯之屬非常食

以犬嘗稻

原禮是月也天子乃以犬嘗稻先薦寢廟註稻始孰也

獻功裘

原周禮天官司裘季秋獻功裘以待頒賜註功裘人工微麤謂狐青麤裘之屬卿大夫所服

除道

原國語先王之教曰雨畢而除道又夏令曰九月除道增王居明堂禮季秋除道致梁以利農淮南

子季秋之月通路除道從境始至國而後已唐書百官志凡津梁道路治以九月

冬裘具

原國語隕霜而冬裘具注孟冬則天子始裘故九月可以具之夏小正王始裘傳王始裘者何

也衣裘之時也

宣布令德

增國語六曰無射所以宣布哲人之令德示民軌儀也注九月曰無射乾上九也九月陽

氣收藏萬物無射見者故可以徧布前哲之令德示民道法也

出火

原夏小正主夫出火傳主夫也者主以時縱火也廣義注夫當作火古者季春出火所以焚萊於是

民用之火於田野者不禁季秋雖納火然而火之用有不可廢如昆蟲既蟄而以火田之類於是主火度其用而出之民不得擅其用而不禁也

徒杠成

增孟子歲十一月徒杠成趙註周十一月夏九月可以成步度之功

郡守符

增漢書文帝紀二年九月初與郡守為銅虎符竹使符注應劭曰銅虎符第一至第五國家當

發兵遣使者至郡合符符合乃聽受之竹使符皆以竹箭五枚長五寸鐫刻篆書第一至第五師古曰與郡守為符者謂各分其半

右畱京師左以與之

勸農賜租

增漢書文帝紀二年九月詔曰農天下大本也民所恃以生也而民或不務本而事末

故生不遂朕憂其然故今茲親率羣臣
農以勸之其賜天下民今年田租之半

親策賢良

增漢書文帝紀十五年九月詔諸侯王公卿
郡守舉賢良能直言極諫者上親策之傳納

以言註傳讀曰敷敷
陳其言而納用之

振飢

增漢書武帝紀元鼎二年九月詔曰仁不異遠義
不辭難今京師雖未為豐年山林池澤之饒與民

共之今水潦移於江南迫隆冬至朕懼其飢寒不活江
南之地火耕水耨方下巴蜀之粟致之江陵遣博士中
等分循行諭告所抵無令重困吏民

有振救飢民免其厄者具舉以聞

減鹽賈

增漢書宣帝紀地節四年九月詔曰朕惟百姓
失職不贍遣使者循行郡國問民所疾苦吏或

營私煩擾不顧厥咎朕甚聞之今年郡國頗被水災已
振貸鹽民之食而賈咸貴衆庶重困其減天下鹽賈

上繫囚

增漢書宣帝紀地節四年九月詔曰令甲死者不可生刑者不可息今繫者或以掠辜若飢寒

痠死獄中何用心送人道也朕甚痛之其令郡國歲上繫囚以掠笞若痠死者所坐名縣爵里丞相御史課殿

最以

聞

舉博士

增漢書成帝紀陽朔二年九月詔曰儒林之官四海淵原宜皆明於古今溫故知新通達國體

故謂之博士否則學者無述焉為下所輕非所以尊道德也丞相御史其與中二千石二千石雜舉可充博士

位者使卓

然可觀

齊居決事

增漢書刑法志宣帝選于定國為廷尉求明察寬恕黃霸等以為廷平季秋後請讞時上

常幸宣室齊居而決

事獄刑號為平矣

官候

原淮南子九月官候注候望也
是月繕修守備故曰官候也

置酒賜租

增後漢書光武帝紀建武十九年九月幸南陽進幸汝南南頓縣舍置酒會賜吏人復南

頓田租歲

行稼觀獲

增後漢書章帝紀建初七年九月甲戌幸偃師東涉卷津至河內下詔曰車駕行秋稼觀

收穫因涉郡界皆精騎輕行無它輜重不得輒修橋道
遠離城郭遣吏逢迎刺探起居出入前後以為煩擾動
務省約但患不能脫粟飲耳所過欲令貧弱有利無
違詔書隋書高祖紀開皇三年九月壬子幸城東觀稼

穀

勞饗賜錢

增後漢書章帝紀建初七年九月己酉進幸鄴勞饗魏郡守令已下至於三老門闢走卒

賜錢各有差勞賜常山趙國吏人復元氏租賦三歲

祠心星

增後漢書禮儀志季秋之月祠星於城南壇心星廟

辟雍鄉射

增漢官儀辟雍去明堂三百步車駕幸辟雍從北門入九月於中行鄉射禮

增俸賜帛

增晉書武帝紀泰始三年九月甲申詔曰古者以德詔爵以庸制祿雖下士猶食上農外

足以奉公忘私內足以養親施惠今在位者祿不代耕非所以崇化之本也其議增吏俸賜王公以下帛各有差

策試諸生

增宋書文帝紀元嘉二十三年九月己卯車駕幸國子學策試諸生答問凡五十九人

課墾殖

增宋書孝武帝紀大明七年九月乙卯詔曰近炎精元序苗稼多傷今二麥未晚甘澤頻降可

下東境郡勤課墾殖
尤弊之家量貸麥種

年高致仕朝參

增舊唐書太宗紀貞觀二年九月丙午
詔內文武羣官年高致仕抗表去職

者參朝之日宜在
六品見任之上

兩都舉選

增舊唐書代宗紀廣德二年九月己未左丞
楊綰知東京選禮部侍郎賈至知東都舉兩

都分舉選
自至始也

圖形凌烟閣

增舊唐書德宗紀貞元五年九月壬戌詔
以褚遂良已下至李晟等二十七人圖形

於凌烟閣以繼
國初功臣之像

有年賜酺

增唐書太宗紀貞觀二年九
月壬子以有年賜酺三日

禁芻牧

增唐書太宗紀貞觀四年九月壬午禁芻牧於古明君賢臣烈士之墓者

縱囚來歸

增唐書太宗紀貞觀七年九月縱囚來歸皆赦之

宴老賜杖

原唐書明皇紀開元二年九月丁酉宴京師侍老於含元殿庭賜九十以上几杖八十以

上鳩杖婦人亦如之賜於其家

授衣假

增唐書選舉志四門學生補太學太學生補國子學每歲九月有授衣假

免課役

增唐書食貨志凡新附之戶秋以九月課役皆免

置弘文館

增唐書要武德九年九月太宗即位於弘文殿聚四部羣書二十餘萬卷於殿側置弘文

館選天下賢良文學之士虞世南褚亮姚思廉歐陽詢蔡允恭蕭德言等以本官兼學士令更宿直聽朝之隙

引入內殿講論文義商榷政事或至夜分方罷貞觀初
令褚遂良檢校館務號館主因為故事其後有張太素

劉禕之范履冰
相次為館主

開通濟渠

增唐會要開元二十八年九月魏州刺史盧
暉開通濟渠引流至州城夾州置樓百餘間

以貯江淮之貨

檢校權量

增通鑑武德八年九月癸卯
初令太府檢校諸州權量

經筵宴賜

增宋史禮志元祐二年九月經筵講論語徹
章賜宰臣執政經筵官宴於東宮帝親書唐

人詩
賜之

增置修撰

增燕翼詒謀錄政和六年九月手詔天下人
才富盛趨事赴功者衆不足以待多士可增

置直徽猷閣直顯謨閣直寶文閣直天章閣秘閣修撰集英殿修撰凡九等

文苑英華

增麟臺故事淳化七年九月詔翰林學士承旨李昉等閱前代文集撮其精要以類分之

為文苑英華續命翰林學士蘇易簡等共成之雍熙三年上之凡一千卷

朝陵拜墓

增乾淳歲時記是月遣使朝陵如寒食儀都人亦出郊拜墓用繇毬搯衣之類

賜錦袍

增玉海景德元年九月河北轉運使劉綜言每歲朝廷遣使賜遣城冬服諸軍將校皆給錦袍

惟轉運使副止放阜花丁亥并賜河東陝西三路使副方勝練鵲錦袍

訓閱弓手

增玉海慶歷二年簡河東弓手武勇者為義勇陝西弓手為保捷每歲九月農隙訓閱

編太平故事

增玉海慶歷三年九月樞密副使富弼請考祖宗故事可行者為書置在二府俾為

模範得以遵守上嘉其奏丙戌命史館檢討王洙集賢校理余靖歐陽修秘閣校理孫甫等同編命弼領之名曰太平故事四年九月上之凡九十六門二十卷弼為序

賜軍士羊裘

增玉海康定元年九月辛酉賜陝西軍士羊裘言者以塞土苦寒請以羊裘賜戰士

一裘用五羊皮
聽軍士自製

燕澄碧殿

增玉海淳熙四年九月丙辰詔侍讀史浩錫燕澄碧殿浩進古詩三十韻御製俯同其韻

云皓首持六經日侍明光裏翼乎鴻遇風縱矣魚在水眷言澄碧行勝賞得紆趾亦屢引公卿對此談政理虛心欲受人忠言資逆耳朕瘠天下肥至樂無易此期爾罄嘉謀使我勲業起

備歉歲

增金史太宗紀天會五年九月丁未詔曰內地諸路每耕牛一具賦粟五斗以備歉歲

賜絹絮

增金史熙宗紀皇統元年九月戊申詔賜鰥寡孤獨不能自存者人絹二疋絮三斤

民用

授衣

原詩九月授衣傳九月霜始降婦功成可以授冬衣矣增張協七命白商素節月既授衣天凝地閉

風厲霜飛

叔苴

原詩九月叔苴疏叔拾也苴麻之有實者也以麻九月初熟拾取以供羹菜其在田收穫者猶納倉

以供常食也

采荼薪樗

原詩采荼薪樗傳樗惡木也疏樗唯堪為薪故云惡木荼以為菜樗以為薪各從所宜而

立文耳

築場圃

原詩九月築場圃箋場圃同地自物生之時耕治之以種菜茹至物盡成熟築堅以為場

伐薪為炭

原禮是月也草木黃落乃伐薪為炭注伐木必因殺氣淮南子昂星中則收斂畜積伐薪

木

樹麥

原夏小正樹麥傳鞠榮而樹麥時之急也增管子桓公曰寡人欲毋殺一士毋頓一戟而辟方都二

為之有道乎管子對曰涇水十二空汶淵洙浩滿三之於乃請以令使九月種麥日至日獲則時雨未下而利農事矣桓公曰諾令以九月種麥日至而獲量其父一收之積中方都二故此所謂善因天時辯於地利而辟

方都之道也

備藏

原國語草木節解而備藏注備收藏也月令季秋農事畢收

作葵藿

增四民月令九月作葵藿乾葵

藏茺薑

增四民月令九月藏茺薑注字林曰薑御涇之茺茺音紫齊民要術薑九月掘出置屋中中國

土不宜薑僅可存活勢不滋

息種者聊擬藥物小小耳

九月事宜

增四民月令九月治場圃塗圉倉修竇窖繕五兵習戰射以備寒凍窮厄之寇存問九族

孤寡老病不能自存者分厚徹重以救其寒

收青桐子

增雜五行書青桐九月收子

雲母芝

增抱朴子雲母芝生於名山之陰青蓋赤莖味甘季秋以竹刀採之陰乾治食使人身光壽千

歲

白醪酒

增食經作白醪酒法生秫米一石方麴二斤細

之使和調蓋滿五日乃好酒

甘如乳

九月半後可作也

藏蘘荷

增齊民要術蘘荷九月中取

大豆葉

增齊民要術大豆九月中候近地葉有黃落者

落盡遇雨
澤爛不成

種蒜

增齊民要術蒜宜良輒地三徧熟耕九月初種

取茄子

增齊民要術茄子九月熟時摘取擘破水

藏蟹

增齊民要術藏蟹法九月內取母蟹得則水中勿

令傷損及死者一宿腹中浮先煮薄糖著活蟹於

冷糖甕中一宿著蓼湯和白鹽特須極鹹待令甕盛半
汁取糖中蟹內著鹽蓼汁中便死泥封二十日出之舉
蟹臍著薑末還復臍如初內著柑甕中百箇各一器以
前鹽蓼汁澆之令沒密封勿令漏氣便成矣特忌風裏
則壞而不美也

冬米明酒

增齊民要術冬米明酒法九月漬清稻米一
斗擣令細末沸湯一石澆之麴一斤末攪和

三日極酢合二斗釀

米炊之氣刺人鼻便為大發攪
成用方麴十五斤酸之米三斗水四斗合和釀之也

鄮酒

增齊民要術作鄮酒法以九月中取秫米一石六
斗炊作飯以水一石宿漬麴七斤炊飯令冷酸麴

汁中覆甕多用荷葉
令酒香燥復易之

禳火災

原千金方九月內於戌地開坎深二三尺
埋炭五斤土覆之戌為火墓地以禳火災

禰祭

原朱子家禮集說禰祭考曰禰禰近也季秋擇日而祭程子曰季秋成物之始亦象其類而祭之

天南星

增本草綱目天南星即虎掌九月采根去皮臍入器中湯浸五七日日換三四遍洗去涎暴乾

用或再火
炮製用

烈節酒

增本草綱目烈節生榮州多在林箐中莖葉俱似丁公藤而纖細無花實九月采莖暴乾楊侯

家藏經驗方有烈
節酒治歷節風痛

菰米

增本草綱目菰米一名彫胡九月抽莖開花如葦芳結實長寸許霜後采之大如茅針皮黑褐色其

米甚白而滑膩作飯香脆杜
甫詩波漂菰米沉雲黑即此

赤瓜

增本草綱目赤瓜棠棣子山櫨一物也九月霜後取帶熟者去核曝乾或蒸熟去皮核搗作餅子曰

乾用

枸骨樹子

增本草綱目枸骨樹如杜仲詩云南山有枸

色人采其木皮煎膏以粘鳥雀謂之粘鵠

採棗

原本草凡棗九月採日曬乾補中益氣久服神仙

刈苔簾

增經世民事錄苔簾即獨掃屋側路旁皆可種以草繩束腰九月刈取以石壓匾收之

乾地黄

增忘懷錄造乾地黄法九月末掘取肥大者去鬚熟蒸微曝乾又蒸微曝食之如蜜可停久遠

蛇黃

增名勝志平南縣蛇黃岡在縣北四里岡勢盤紆出蛇黃每歲九月邑人掘深七八尺始得大如雞

子小者如彈丸其色紫磨之可傳腫毒尤治小兒驚癇

忙月

增嘉興縣志九月藝麥豆栽桑
築場子婦竭作亦謂之忙月

三勒漿

原遵生八牋九月宜合三勒漿用訶梨勒批梨
勒菴摩勒三味和核搗如麻豆大用三兩次用

蜜一斗以新汲水二斗調勻傾甕中即下三勒熟攪密
封三四日後開又攪之以乾淨布拭去汗蜜封共三十

日方成味甚美
飲之消食下炆

天道南行

原遵生八牋是月也天道
南行作事出行俱宜向南

益肝氣

增雲笈七籤季秋肝藏氣微肺金用事宜
減辛增酸以益肝氣助筋補血以及其時

趙孟頫九月耕詩

增大家饒米麪何啻百室盈縱復人
力多春磨常不停激水轉大輪磴碾

亦易成古人有機智用之可厚生朝出連百車莫入還
滿庭勾稽數多寡必假布算精小人好爭利晝夜心營

營君子貴知足
知足萬慮輕

趙孟頫九月織詩

增季秋霜露降凜凜寒氣生是月當授衣有布織未成天寒催刀尺機杼

可無營教女學紡繡舉足疾且輕舍南與舍北嘒嘒聞車聲通都富豪家華屋貯娉婷被服雜羅綺五色相間明聽說貧家女惻然當動情

物候

桑落

增詩桑之落矣其黃而隕箋謂其時季秋也

蟋蟀在堂

原詩蟋蟀在堂傳蟋蟀蓋也九月在堂又九月在戶疏九月則在室戶之內

草蟲鳴

增詩嘒嘒草蟲箋草蟲鳴晚秋之時也

鴻鴈來賓

原禮鴻鴈來賓疏上仲秋直云鴻鴈來今季秋云來賓以仲秋初來則過去故不云賓今

季秋鴻鴈來賓者客止未去也猶如賓客故云集說鴈以仲秋先至者為主季秋後至者為賓如先登者為主

人從之以登者為客也夏小正遯鴻鴈傳遯往也增淮南子候鴈來賓註賓雀者老雀也棲宿人家堂宇之間

如賓客也詩紀歷樞天霜樹落葉而鴻鴈南飛

爵為蛤

原禮爵入大水為蛤註大水海也夏小正爵入於海為蛤傳爵入於海為蛤蓋有矣非常入也

鞠有黃華

原禮鞠有黃華註鞠本又作菊集說鞠色不一而專言黃者秋令在金金自有五色而黃

為貴故鞠色以黃為正也夏小正榮鞠傳鞠草也增陶潛詩秋菊有佳色裛露掇其英楊炯庭菊賦鬱兮蔓衍郁兮芬芳瑤枝金萼兮翠葉紅芒秋星下照金氣上騰風蕭蕭兮瑟瑟霜刺刺兮稜稜當此時也弱其志強其

骨獨歲寒而晚登

豺祭獸

原禮豺乃祭獸殘禽疏禽獸皆殺之但殺獸而又陳殘禽則殺之而已不以為祭增獸經豺祭

以獸其陳也方秋獵候也

蟄蟲咸俯

原禮蟄蟲咸俯在內皆墜其戶疏俯垂頭也墜塗也前月但藏而坏戶至此月既寒故垂

頭向下以隨陽氣陽氣稍沉在下也而又塗塞其戶穴以避地上陰殺之氣也

陟元鳥蟄

原夏小正陟元鳥蟄傳陟升也元鳥者鷺也先言陟而後言蟄者何也陟而後蟄也

蟄獸

原夏小正熊羆貉貉則穴廣義注此周官所謂蟄獸也

樹槐

原淮南子其樹槐註槐懷也可以懷來遠人也

鬼目樹

增廣州記鬼目樹似棠梨葉如楮皮白樹高大如木瓜而小邪傾不周正味酢九月熟

仙人桃

增洛陽伽藍記景陽觀山南百果園有仙人桃其色赤表裏照徹得嚴霜乃熟亦出崑崙山一

桃

曰王母桃也

柿葉赤

增韓愈遊青龍寺詩秋灰初吹季月管日出卯南暉景短友生招我佛寺行正直萬株紅葉滿

光華閃

壁見神鬼赫赫炎官張火傘然雲燒樹大實駢

金烏下

啄蘋虬卵志林韓退之青龍寺詩終篇言赤色

莫曉其

故嘗見小說鄭虔寓青龍寺貧無紙取柿

葉書

九月柿葉赤而實紅則退之詩乃謂此也

合掌柏

增酉陽雜俎汝西有練溪多異柏及暮秋葉上斂俗呼合掌柏

鴛鴦菊

增曲洧舊聞草烏頭近畿如嵩少具茨諸山亦多有之花開九月色青可愛玩人多移植園圃

號鴛鴦菊蓋
取其近似耳

拒霜花

增錦繡萬花谷拒霜花樹叢生葉大而
其花甚紅九月霜降時開故名拒霜

鴈來紅

增本草綱目鴈來紅莖葉穗子並與雞冠同其
葉九月鮮紅望之如花故名吳人呼為老少年

辛夷實

增本草綱目辛夷其樹似杜仲子似冬桃而小
九月采實暴乾去心及外毛毛射人肺令人欬

香薷

增本草綱目香薷中州人呼為香菜方莖尖葉九
月開紫花成穗有細子細葉者僅高數寸葉如落

帚藥即石
香薷也

兔絲子

增本草綱目兔絲子蔓延草木之上九月采實
曝乾色黃而細者為赤綱色淺而大者為菟絲

女貞

增本草綱目女貞葉似冬青
樹其實九月熟黑似牛李子

水仙

增本草綱目水仙花葉似蒜其花香甚清
九月初栽於肥壤則花茂盛瘦地則無花

南燭

增本草綱目南燭是木而似草故號南
燭草木其子如茱萸九月熟酸美可食

蔓荊

增本草綱目蔓荊生水濱苗莖蔓延長
丈餘九月有實黑斑大如梧子而虛

補骨脂

增本草綱目補骨脂俗訛為破故紙生嶺南諸
州及波斯國莖高三四尺葉小似薄荷花微紫

色實如麻子圓
扁而黑九月采

茵陳

增本草綱目山茵陳其莖如艾其葉如淡色青蒿
而背白葉歧緊細而扁整九月開細花黃色結實

大如艾子花實
並與菴蘭相似

九仙子

增本草綱目九仙子出均州太和山一根連綴
九枚大者如雞子小者如半夏白色葉如烏桕

葉而短扁不圓每葉極生子枝
或一或二裊裊下垂九月采根

華菱

增本草綱目華菱嶺南有之多生竹林內叢高三尺其莖如筋葉青圓如戴菜濶二三寸如桑面

光而厚開花白色結子如小指大青色類榧子而長九月收采曝乾南人愛其辛香或取葉生茹之

麴條魚

增燕山叢錄寶坻銀魚都下所珍北人稱為麴條魚形似東吳鱸殘而倍大出海巾蛤山下秋

深霜降上溫泉產子映日望之波浪皆成銀色人每候其至網之

綠薺

增卞伯玉薺賦終風掃於暮節霜露交於杪秋有萋萋之綠薺方滋繁於中丘

蒲萄熟

增白樂天蒲萄詩九月肅霜初熟時寶璫碌碌珠累累

占驗

愆候

原禮季秋行夏令則其國大水冬藏殃敗民多孰

噫

注未之氣乘之也又行冬令則國多盜賊遑竟

不寧土多分裂注丑之氣乘之也又行春令則暖

風來至

民氣解情師興不居注辰之氣乘之也

粟米占

增師曠占粟米常以九月為本若貴賤不時以

本貴在來秋此收穀遠近之期也

歲陰在戌

增史記天官書閹茂歲歲陰在戌星居巳以九月與翼軫辰出曰天睢白色大明其失次

有應見東壁歲水注索隱曰爾雅在戌曰閹茂孫炎云萬物皆蔽冒故曰閹茂

九月晴雨

原田家五行重九日晴則冬至元日上元清明四日皆晴雨則皆雨諺云重陽無雨一冬

晴又諺云九日雨米成脯又云重陽濕漉漉穰草錢千束四時占候九月雨大宜收禾又云九月九日是雨歸

路日有雨
來年熟

以日占月
原戎事類占自一日至九日以
日占月遇此日風則此月穀賤

雷占
原戎事類占九
月雷主穀貴

霜雨占
原戎事類占霜不下則來年三月多陰寒多雨
主米貴增文林廣記九月庚辰辛卯日雨主冬

穀貴
一倍

朔值占
原雜占朔日值寒露主冬
寒嚴凝值霜降主歲歉

朔日風雨占
原雜占朔日風雨主春旱夏雨芝麻
貴又朔日東風半日不止主米麥貴

上卯日風
原雜占九月上卯日北風主來年三
七月米大貴東風亦然西北平平

晴占

原雜占十三日晴則冬晴柴賤增嘉定縣志九月十三日為稻籬生日宜晴又云十三晴不如十四

靈十四晴釘靴

掛斷鼻頭繩

虹占

增文林廣記虹以九月出西方大

電占

增文林廣記九月雨電不利牛馬

雜紀

赤爵銜書

增史記周本紀有聖瑞疏季秋之月甲子赤爵銜丹書入於鄴止於昌戶其書云敬勝怠

者吉怠勝敬者滅義勝欲者從欲勝義者凶凡事不強則不枉不敬則不正枉者廢滅敬者萬世以仁得之以仁守之其量百世以不仁得之不及其世此蓋聖瑞尚書中候周

文王為西伯季秋之月甲子赤雀銜丹書入豐鄣止於昌戶乃拜稽首受取

得玉杯

增漢書文帝紀十六年秋九月得玉杯刻曰人主延壽令天下大酺

獻白雉兔

增後漢書光武紀建武十三年九月日南徼外獻白雉白兔

感夢白帝

原帝王世紀扶始以季秋下旬夢白帝遺鳥喙子旦而升邱見白虎其上有雲感已而生

臯陶於
曲阜

上西門

增李尤上西門銘上西在季位月惟戌菊黃豹察號令嚴悉

作金虎臺

增魏志建安十八年九月作金虎臺鑿渠引漳水入白溝以通河

獻汗血馬

增晉書武帝紀泰始六年九月大宛獻汗血馬

無忌月

原晉書禮志穆帝納后欲用九月九月是忌月范汪問王彪之答云禮無忌月不敢以所不見

便謂無之博士曹觥荀詡等並謂無忌月之文不應有妨王洽曰若有忌月當復有忌歲

釣白蛟

增拾遺記漢宣帝元鳳二年於淋池之南起桂臺以望遠氣帝常以季秋之月泛蘅蘭雲鷁之

舟窮晷係夜釣於臺下以香金為鈎繡絲為綸丹鯉為餌釣得白蛟長三丈若大蛇無鱗甲命太官為鮓肉紫

骨青味

甚香美

飛蛾集燭

增傅亮感物賦序余以暮秋之月迷職內禁夜清務隙遊目藝苑於時風霜初戒蟄類尚

繁飛蛾翔羽翩翾滿室赴軒幌集明燭者必以燠減為度雖則微物矜懷者久之

桑再樾

增異苑漢興平元年九月桑再樾時劉元德軍小沛年荒穀貴士眾皆飢仰以為糧

溫泉出

增魏書靈徵志太宗泰常七年九月溫泉出於涿鹿人有風寒之疾入者多愈

神鼎出

增魏書靈徵志高宗太和二年九月鼎出於洛州涇水送於京師王者不極滋味則神鼎出也

孝感獲瓜

增魏書宋瓊傳瓊少以孝行稱母曾病季秋之月思瓜不已瓊夢想見之求而遂獲時人

異稱

捍虎圖

增水經注虎園東魏太平真君五年城之以牢虎也季秋之月親御園上勅虎士効力於其下

事同奔戎生制猛獸即詩所謂袒裼暴虎獻於公所也故魏有捍虎圖

甘露宴

增南史陳宣帝紀太建七年九月甘露頻降樂游苑丁未輿駕幸苑採甘露宴羣臣詔於苑龍

舟山立

甘露亭

鵲鵲頌

增唐明皇帝鵲鵲頌并序朕之兄弟惟有五人每聽政之後延入宮掖申友于之志詠常棣之

詩邕邕如怡怡如展天倫之愛也秋九月辛酉有鵲鵲千數棲集於麟德殿之庭樹竟旬焉飛鳴行搖得在原之趣昆季相樂縱目而觀者久之左清道率府長史魏光乘預觀其事以獻其頌美其彬蔚俯同頌云伊我軒宮奇樹青蔥藹周廬兮冒霜停雪以浹以悅恣卷舒兮連枝同榮吐綠含英曜春初兮蓐收御節寒露微結氣清虛兮桂宮蘭殿惟所息宴棲雍渠兮行搖飛鳴急難有情情有餘兮顧唯德涼夙夜兢惶慙化疎兮上之所教下之所效實在予兮天倫之性魯衛分政親賢居兮爰遊爰處爰笑爰語巡庭除兮觀此翔禽以悅我心良

史書
兮

河清

增唐會要武德七年九月丹州言河水清又實應元年九月甲午太州至陝州二百餘里河清澄澈

見底

御閣觀酺

增唐會要上元元年九月甲寅御翔鸞閣觀酺時赤縣與太常音樂分東西朋帝詔雍王

賢主東周王顯
主西因以角勝

冬蠶成繭

增唐會要大歷五年九月
太原奏文水縣冬蠶成繭

書玉堂署

增宋史太宗紀淳化二年九月帝飛白書
玉堂之署四字以賜翰林承旨蘇易簡

宗室座右銘

增宋史真宗紀大中祥符三年九月
丁亥作宗室座右銘賜諸王

百歲補郎

增宋史理宗紀景定三年九月丁丑温州布衣李元老讀書安貧不事科舉今已百四歲

詔補迪功郎致仕本郡給奉

次定四庫全書

御定月令輯要

五

頌大晟樂

增宋史樂志政和三年九月詔大晟樂頌於太學辟廡諸生習學所服冠以弁袍以素紗

卓緣紳帶佩玉
從劉曷製也

合穗禾

增宋史五行志太平興國元年九月隰州獻合穗禾長尺餘玉海祥符九年九月壬戌永靜軍

言禾異

隴合穗

不忘往亡

增通鑑憲宗元和十二年九月甲寅李愬將攻吳房諸將曰今日往亡愬曰吾兵少不足

戰宜出其不意彼以往亡不吾虞正可擊也遂往克其外城斬首千餘級註陰陽家之說九月以寒露後第二

十七日
為往亡

科目展限

增師友談記東坡云國朝試科目昔在八月
中旬頃與黃門將試黃門忽感疾臥病相國

韓魏公知之輒奏上曰今歲召制科之士惟蘇軾蘇轍最有聲望今聞蘇轍偶病如此人兄弟中不得一人就試甚非衆望欲展限以俟上許之凡比常例展二十日自後試科目竝在九月始此

畫朝貢衣冠

增燕翼詒謀錄祥符八年九月直史館張復上言乞纂朝貢諸國衣冠畫其形狀錄

其風俗以備史官廣記從之

製定命寶

增燕翼詒謀錄政和七年九月辛巳製定命寶範圍天地幽贊神明保合太和萬壽無彊

為文廣九寸號九寶

書序孝經

增金石論明皇注孝經四卷天寶四載九月八分書御製序云舉六家之異同會五經之

旨趣約文敷義分注錯經寫之琬琰庶補將來

酒庫開清

增乾淳歲時記戶部點檢所十三酒庫例於九月初開清每庫各用疋布書庫名高品以

長竿縣之謂之布牌以木牀鐵擎為仙佛鬼神之類駕空飛動謂之臺閣雜劇百戲之外又為漁父習閑竹馬出獵八仙故事命妓家女使裹頭花巾為酒家保庫妓皆珠翠盛飾銷金紅背乘繡羈寶勒駿騎各有皂衣黃號私身數對詞導於前浮浪開客隨逐於後少年狹客往往簇釘持杯爭勸馬首金錢綵緞需及與臺所經之地高樓邃閣繡幕如雲累足駢肩真所謂萬人海也

紫芝生

增玉海貞觀十七年九月紫芝生於太廟寢室二十四莖為龍鳳形

上明良集

增玉海天禧二年九月癸酉龍圖閣待制李虛已上奉詔集羣臣所和御製詩為明良集

五百卷詔賜器幣

賜瑞鹽

增玉海祥符三年九月辛巳賜近臣及三館秘閣解州瑞鹽

賜詞林字

增玉海至和元年九月王洙為學士仁宗嘗以塗金龍水牋為飛白詞林二字賜之

賜耕耨茶帛

增玉海天聖二年九月辛卯祠太一宮駐輦賜道左耕耨茶帛

賜金盆

增玉海治平三年九月丙辰夜召學士王珪至藥珠殿特詔中書除端明殿學士翌日又賜盤

龍金盆一曰知卿忠純有守故有此賜

鑿洞大設

增溪蠻叢笑富洞以九月燕為大設

鑿河取石

增遼史太祖紀天贊三年九月丁巳鑿金河水取烏山石輦致潢河木葉山以示山川朝

海宗嶽之意

千齡節

增遼史聖宗紀統和元年九月辛未有司請以帝生日為千齡節從之

獲三十六熊

增遼史興宗紀重熙五年九月獵黃花山獲熊三十六

小五臺星光

增元好問詩注繫舟山僧徒謂之小五臺九月中時有景星如佛光

持齋

增法苑珠林佛言九月者少陰用事乾坤改位萬物畢終衰落無牢衆生蟄藏神氣歸本因道自寧

故持九月一日齋竟十五日

感夢神人

增法苑珠林漢明帝永平七年九月帝夢神人長丈六面作真金色太子舍人傳毅奏稱

臣聞外國淨飯王太子號悉達出家成道陛下夢警將無感也即敕使西尋抄聖教六十萬五千言以白馬驮還

乘雲駕鶴

增雲笈七籤秦始皇三十一年九月庚子茅盈高祖濛於華山之中乘雲駕鶴白日昇天

御製暮秋重出居庸關詩亂榆叢柳未經霜峻嶺重巒曉

色蒼峽裏細泉流不竭仍聞太古韻鏗鏘

晉九月折楊柳歌

增甘菊吐黃花非無杯觴用當奈許寒何折楊柳授歡羅衣裳含笑言不

取

齊竟陵王子良九月侍宴詩


增月殿風轉層臺氣寒高雲斂色遙露已團式詔司

警言戾秋巒輕觴時薦落英可食

李賀九月樂詞

增離宮散螢天似水竹黃池冷芙蓉死月綴金鋪光脈脈涼苑虛庭空澹白露

花飛飛風草草翠錦欄斑滿層道雞
人罷唱曉瓏鴝啼金井下疎桐



御定月令輯要卷十六